

**Bosna i Hercegovina
Federacija Bosne i Hercegovine
Zeničko-dobojski kanton
OPĆINA VAREŠ
OPĆINSKO VIJEĆE**



**Broj: 01- 102 /10
Vareš, 05.05. 2010. godine**

Na osnovu člana 11. Zakona o komunalnim djelatnostima («Službene novine Zeničko-dobojskog kantona», broj 17/08) i člana 22. tačka 2. Statuta Općine Vareš, broj 01-25/09 od 29.01. 2009. godine, Općinsko vijeće Vareš, na 18.sjednici održanoj dana 05.05.. 2010. godine, d o n o s i

O D L U K U

o standardima komunalnih usluga

Član 1.

Ovom Odlukom utvrđuju se standardi vršenja usluga individualne i zajedničke komunalne potrošnje na općini Vareš.

Član 2.

Uslugama individualne i zajedničke komunalne potrošnje u smislu ove Odluke, smatraju se:

- održavanje čistoće na javnim površinama
- čišćenje i razgrtanje snijega i leda sa javnih gradskih površina i lokalnih puteva
- održavanje javnih površina
- odvođenje atmosferskih voda
- održavanje javne rasvjete
- dekorisanje
- snabdijevanje pitkom vodom
- prikupljanje i odvoz komunalnog otpada na deponiju

Član 3.

Standardi vršenja usluga individualne i zajedničke komunalne potrošnje utvrđuju se kako slijedi:

ODRŽAVANJE ČISTOĆE NA JAVNIM POVRŠINAMA

Otpad koji se uklanja sa javnih saobraćajnih i zelenih površina je definisan Programom finansiranja komunalnih djelatnosti koji se donosi do kraja svake godine za narednu godinu. (dalje u tekstu «Program»).

Javne saobraćajne i zelene površine obuhvataju ulice, zelene površine, kao i ostale površine navedene u Programu.

Suho čišćenje ulica se vrši dinamikom utvrđenom Programom.

Suho čišćenje javnih površina, ulica i trotoara će se vršiti u periodu od od 01.04. do 31.10 svake. godine.

Pranje javnih površina obavljat će se mašinski (auto-cisternom). Pranje javnih saobraćajnih površina i pješačkih površina vršiće se u periodu od 01.04 do 31.10.svake godine.

Ukoliko se ukaže potreba, moguća su i vanredna pranja ulica, što će biti definisano nalogom koji izdaje Općinski načelnik.

ČIŠĆENJE I RAZGRTANJE SNIJEGA I LEDA SA JAVNIH GRADSKIH POVRŠINA I LOKALNIH PUTEVA

Pod zimskom službom podrazumijevaju se radovi neophodni za održavanje prohodnosti lokalnih puteva, ulica, trotoara, stepeništa i drugih saobraćajnih javnih površina za režim saobraćaja u zimskim uslovima.

Za neometano izvođenje zimske službe, bez većih zastoja saobraćaja, potrebno je pripremiti sljedeće:

- a) obezbijediti dovoljnu količinu sredstava za posipanje,
- b) osposobiti svu potrebnu mehanizaciju, opremu i specijalne zimske mašine za rad u zimskoj službi,
- c) pripremiti i opremiti ulice sa odgovarajućom zimskom signalizacijom i opremom,
- d) organizovati pravovremeno obavještanje korisnika ulica preko sredstava javnog informisanja.

Odstranjivanje snijega sa kolovoznih površina, trotoara i drugih površina počinje pravovremeno, tako da visina snijega na cestama I i II prioriteta ne prelazi 5 cm, a saobraćaj je moguć uz upotrebu zimske opreme vozila.

Radovi nakon prestanka oborina obuhvataju proširenje očišćenog kolovoza, ručno čišćenje mostova, parkirališta, trotoara, stepeništa i drugih površina.

Radi sprječavanja nastanka poledice dežurne ekipe će stalno nadzirati stanje kolovoza ulica, trotoara i ostalih površina, posebno kritičnijih sekcija, koje su kao takve već iskustveno poznate.

To važi prije svega za oštre krivine, veće kosine, mostove, sjenovite odsjeke, raskršća i mjesta, gdje teče voda sa prilaznih cesta, voda sa kosina, bermi i rigola.

Takva mjesta će se posipati preventivno, odnosno odmah, kada se na kolovozu uoči pojava poledice.

Iz navedenih razloga vršiće se preventivno posipanje, već pri dovoljnoj vjerovatnoći nastanka poledice. To važi za sve prioritete.

Materijali za posipanje će biti na zalih prije početka sezone zimske službe, najmanje u količini od 30% od ukupne procjene potrebnih materijala. Dostava preostalog materijala će se usklađivati sa potrebama tokom trajanja zimske službe.

Sprječavanje klizavosti kolovoza vrši se posipanjem mješavine soli i kamenog agregata.

Posipanje se vrši kamionom sa posipačem, a posipa se samo traka širine 2 m i to po osi kolnika, a u količini od cca 60 kg soli/km kolovoza i 0,30 m³/km agregata. Posipaju se isključivo asfaltirani kolovozi, trotoari i druge površine, a makadamske samo ako postoji opravdana potreba. Ukoliko se ne postignu željeni efekti u jednom prolazu, vrši se naknadno posipanje cijele dionice ili samo zavoja, mostova, uspona i raskršća na određenoj dionici ulice.

Pješačke površine s kamenom ili betonskom podlogom posipaće se odgovarajućim sredstvom za ove materijale.

Prioriteti intervencija su definirani Programom.

Nadzor nad stanjem prohodnosti je organizovan u okviru vršenja nadzora kojeg obavlja nadzorni organ, a koji dnevno po planu pregledava ulice i druge površine i o tome obavještava dežurne u zimskoj službi. Prema potrebi će se obavljati i eventualni manji poslovi za uspostavljanje sigurnog i tekućeg saobraćaja (uređenje odvodnje, odstranjivanje snijega i poledice ručno, davanje zahtjeva za isključivanje vozila na cestama u vanrednim prilikama) Svaka aktivnost i djelovanje zimske službe će biti evidentirana u dnevniku zimske službe koji potpisuje rukovodilac zimske službe i nadzorni organ, u svojstvu odgovornog lica investitora. Na temelju podataka iz dnevnika vrši se plaćanje tranši zimskog održavanja. Za utvrđene manjkavosti u funkcioniranju zimske službe, koje se ne otklone u roku koji naloži nadzorni organ, naplaćuju se penali odbijanjem od mjesečne tranše za zimsku službu, za taj mjesec, u iznosu od 10% od vrijednosti tranše.

Trajanje zimske službe se utvrđuje Programom.

Ceste, ulice, trotoari, stepeništa i ostale površine, koje su obuhvaćene zimskom službom definirane su Programom.

ODRŽAVANJE JAVNIH POVRŠINA

Pod održavanjem javnih površina podrazumijeva se čišćenje, košenje i sakupljanje trave i otpada s javnih zelenih površina, obnova, održavanje i njega drveća, održavanje i obrezivanje ukrasnog grmlja i živice, održavanje i njega sezonskih i trajnih cvjetnjaka, održavanje dječjih igrališta, održavanje opreme na dječjim igralištima, fitosanitetska zaštita bilja, proizvodnja komposta i biljnog materijala za potrebe održavanja, nabavka, sadenje i održavanje sezonskog cvijeća i trajnica, deponiranje sakupljenog otpada, kao i ostali poslovi strukovno potrebni za održavanje javnog zelenila.

Javne zelene površine će se održavati i uređivati u skladu sa Programom

Košenje ovih površina obavljaće se ručno ili mašinski, uz istovremeno kupljenje i odvoženje pokošene trave na privremenu deponiju unutar zelene površine koja će se po završetku košenja odmah odvesti na deponiju (kontejner).

ODVOĐENJE ATMOSFERSKIH VODA

Za normalno funkcioniranje saobraćaja u naseljenim mjestima, a iz razloga zaštite asfaltnih zastora na gradskim ulicama, potrebno je održavati oborinsku kanalizaciju tokom cijele godine.

Odvodnja atmosferskih voda obuhvaća slijedeći obim radova nužno potreban za urbani dio općine Vareš:

- popravak revizionih okana, tijela slivnika i spojeva slivnika na kanalizaciju podizanje okvira i namještanje poklopca,
- čišćenje slivnika, taložnika i spoja slivnika na kanalizaciju, vađenje taloga i odvoz na deponiju,
- zamjena dotrajalih LŽ poklopaca ili rešetki na revizionim oknima ili slivnicima,
- ugradnja oštećenih slivnika i rešetki na području grada vršiće se po potrebi i nalogu Općinskog načelnika, a u skladu sa raspoloživim sredstvima

ODRŽAVANJE JAVNE RASVJETE

Pod pojmom "održavanje javne rasvjete" podrazumijeva se upravljanje i održavanje objekata i uređaja javne rasvjete, što uključuje i podmirivanje troškova električne energije za osvjetljavanje javnih površina, ulica, i cesta koje prolaze kroz naselja.

Održavanje javne rasvjete vršiće se na način da će se neophodne intervencije, u smislu izmjene sijalica, svjetiljki, prigušnica, kablova i ostalog potrošnog materijala i sl. izvršiti najkasnije u roku od 7 (sedam) dana.

DEKORISANJE

Prilikom državnih, općinskih i vjerskih praznika, te odredjenih manifestacija, vršiće se prigodno dekorisanje zastavicama, transparentima i svijetlećim ukrasima u skladu sa Programom koji se donosi do kraja godine za narednu godinu.

Prilikom sačinjavanja Programa vodiće se računa o slijedećim smjernicama:

Uskladiti sve primijenjene dekorativne elemente u pogledu boja, što se naročito odnosi na svjetlosne efekte.

U okviru predvidjenih sredstava za nabavku nove dekorativne opreme primijeniti slijedeće elemente:

- ukrašavanje krošnji drveća
- viseći svijetleći ukrasi (za premoste ulica)
- postavljanje dekorativnih iluminacijskih elemenata na stubove javne rasvjete
- koristiti postojeću dekorativnu opremu
- svi nabrojani iluminacijski elementi i oprema moraju udovoljavati tehničkim normama i standardima, te kao takve biti ugrađene na propisan način

SNABDIJEVANJE PITKOM VODOM

Obavezno je obezbjeđenje pretpostavki za kontinuirano snabdijevanje pitkom vodom tokom cijele godine.

Pritisak u cijevima mora zadovoljavati standarde na način da je omogućen normalan pritisak koji obezbjeđuje normalno korištenje kućanskih aparata i sanitarnih uređaja na svim visinskim tačkama isporuke.

Ispravnost vode će se redovno kontrolisati i o rezultatima nalaza obavještavati javnost
Kontinuirano raditi na poboljšanju uslova isporuke, kao i kvaliteta isporučene vode za piće.

PRIKUPLJANJE I ODVOZ KOMUNALNOG OTPADA NA DEPONIJU

Za odlaganje otpada obezbjeđuju su posude za odlaganje: kontejneri, kante od 80 l, PVC kese i druge prikladne posude.

Odvoz otpada se vrši na način definiran Odlukom o komunalnom redu, kada je u pitanju učestalost odvoza.

Glomazni otpad će se u skladu sa uslovima propisanim Odlukom o komunalnom redu.

Kontinuirano raditi na pokrivanju kompletnog područja općine Vareš sa organizovanim prikupljanjem otpada.

Član 4.

Ova Odluka stupa na snagu osmog dana od dana objavljivanja na oglasnoj tabli Općine Vareš a primjenjuje se od 01.01.2010.godine

**PREDSJEDAVAJUĆI
OPĆINSKOG VIJEĆA**

Josip Malbašić

Ova odluka objavljena je na oglasnoj tabli Općine Vareš, dana 06.05 2010. godine.

OPĆINSKI NAČELNIK

Hamdo Fatić

Obrazloženje Odluke o standardima komunalnih usluga

Pravni osnov za donošenje ove odluke sadržan je u članu 11. Zakona o komunalnim djelatnostima gdje je propisano da: «Davaoci komunalnih usluga dužni su pružati usluge koje odgovaraju kvalitetom i standardom visini cijene koju korisnici usluga plaćaju za njihovo korištenje.

Općinsko vijeće obavezno je utvrditi standarde i usklađivati kvalitet i nivo komunalnih usluga u skladu sa visinom cijena».

Nacrt Odluke je usvojen na 17. sjednici Općinskog vijeća koja je održana 31.03.20010. godine uz zaključak da se u narednih 10-15 dana ,od strane vijećnika u pisanom obliku obrađivaču dostave primjedbe, prijedlozi i sugestije u cilju izrade što kvalitetnije odluke. Do navedenog roka nisu dostavljene nikakve primjedbe,prijedlozi i sugestije.

Za sprovođenje ove odluke nije potrebno planirati finansijska sredstva u budžetu Općine i predlaže se Općinskom vijeću da je usvoji u predloženom obliku.

**PREDLAGAČ
OPĆINSKI NAČELNIK
Hamdo Fatić**